



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 1884 vum 4. Februar 2025 vum honorabelen Deputéierten Här Marc Goergen.

1. Wéi vill Doudesfäll, déi op ee Suizid zrëckzeféiere sinn, goufen 2024 zu Lëtzebuerg identifizéiert?

D'Donnéeën zur Mortalitéit vum Joer 2024 sinn nach net disponibel.

2023 goufen 48 Doudesfäll duerch selwer zou gefouerte Verletzunge gezielt. Dëst entsprécht engem Stierflechkeetstaux duerch Suizid vu 6,3 pro 100.000 Awunner.

2. Wéi eng Mënschen zu Lëtzebuerg sinn tendenziell éischter gefäerdet, fir Suizid ze begoen?

Et gi verschidde Facteuren, déi de Suizidrisiko kënnen beaflossen.

Männer hu generell e méi héije Suizidtaux wéi Fraen. 2023 waren et zu Lëtzebuerg 12 Fraen an 36 Männer.

Doriwwer eraus geet aus dem "Plan national prévention suicide" a senger Evaluatioun ervir, datt de Selbstmordtaux bei de Jonken (prinzipiell Doudesursaach) a bei eelere Persounen méi héich ass.

Och wann verschidde Risikofacteuren identifizéiert sinn, bleift d'Estimatioun vum Impakt vun all eenzelnem Facteur komplizéiert wéinst de potentiellen Interaktiounen (z. B. Handicap, chronesch Krankheeten, Aarmut,...)ⁱⁱⁱ.

Etude'en weisen awer och datt et Protektiounsfakteure ginn, sou wéi Selbstvertrauen, sozial Kompetenzen, positiv a konstruktiv tëschemënschlech Relatiounen, perséinlech a beruflech Perspektiven, a nach méi. Wann ee sech als Laascht fillt oder net méi erkennt datt een an ee sozialt Netz integréiert ass, klëmmt also de Risiko.

3. An der Äntwert op d'Fro 7247 hat d'Regierung geschriwwen:

Um Niveau Suizidpreventioun bei den Jonken gesäit d'Regierung am Kader vun den Folge-Aktiounen vum Suizidpreventiounsplan 2015-2019 vir, d'Preventioun ze verbessern andeem den Zougang zu den jugendpsychiatrieschen, souwéi psychosozialen Servicer verbessert gëtt. Sou soll d'Kollaboratioun tëschent dem Service National vun der Jugendpsychiatrie, den Strukturen vun der Aide à l'Enfance an dem Office National de l'Enfance renforcéiert ginn. Ziel wier, d'Evaluatioun souwéi d'Prise en Charge vun den Jonken, déi eng akut oder latent suizidal Symptomatik opweisen, ze renforcéieren.

Gouf dëst ëmgesat? Falls jo, wat fir eng konkret Ännerunge goufe gemaach a wéini?

Am Kader vun der Preventioun si verschidden Aktiounen ëmgesat ginn.

D'Formatiounen zur Suizidprävention fir Enseignant'en, Jugendlecher an all Persoun, déi un der Detektioun vun Zeeche vun der Verschlechterung vun der psychescher Gesondheet interesséiert ass, sinn weider ausgebaut ginn. Aktuell sinn 6.909 Secouristen zum Thema vun der psychescher Gesondheet ausgebild ginn (dat sinn der bal 6.000 méi wéi zum Zäitpunkt vun der Evaluatioun vum Plang am Joer 2020).



Weiderhin sinn och Informatiounscampagn ëmgësat ginn. 71 Partner hunn sech am Kader vun der Woch vun der mentaler Gesondheet (7. bis 20. Oktober 2024) mobiliséiert an 134 Evenementer zum Thema „Soutenir les jeunes, construire l’avenir“ organiséiert.

Fir den Depistage ze verbesseren huet de Conseil scientifique du domaine de la santé am Joer 2021 eng Recommandatioun un d’Hausdoktere geriicht an huet drun erënnert, datt Tester disponibel sinn, fir den psychosoziale Risiko an d’Suchtverhale bei Jugendlechen ze evaluéieren (dëst kann en Zeeche vun Onzefriddenheet an e Risikofacteur fir e Selbstmord sinn). E Preventiounsguide “Addictions aux substances” fir Professioneller an de Schoulen ass am Dezember 2024 vum CePAS mat der Ënnerstëtzung vun der Fondation Solina verëffentlecht ginn.

An dësem Kontext ass d’Unzuel vun den autoriséierte Better am “Service national de psychiatrie juvénile” vu 35 Better am Joer 2018 op aktuell 45 Better erhéicht ginn.

4. Doriwwer eraus erhofft sech d’Regierung natierlech och mam rezenten Accord betreffend den Remboursement vun den Psychotherapeuten, dat dës Aktioun och en Impakt op Suizid-Taux’en bei den Jonken wäert hunn, duerch en vereinfachten Zougang zu enger Psychothérapie.

Wéi vill Persounen hunn 2024 vum Remboursement fir eng Psychothérapie profitéiert?

Am Joer 2024 hunn 14 589 Persounen (9 743 Fraen an 4 846 Männer) vun enger prise en charge vun psychothérapeutesche Leeschtungen duerch d’assurance-maladie profitéiert. Den Tableau hei drënner weist den Total pro Altersgrupp:

Altersgrupp	Zuel vun Patienten
0-9	319
10-19	1.258
20-29	2.433
30-39	4.077
40-49	3.202
50-59	2.174
60-69	840
70-79	236
80-89	50
Total	14.589

Lëtzebuerg, den 4. Mäerz 2025

D’Ministesch fir Gesondheet
a sozial Sécherheet

(s.) Martine Deprez

ⁱ <https://santesecu.public.lu/dam-assets/fr/espace-professionnel/exposes/11-28-2017-journee-retrace/etude-facteurs-risque-donghia-bucki.pdf>

ⁱⁱ https://sante.gouv.fr/IMG/pdf/2e_rapport_de_l_observatoire_national_du_suicide.pdf